

DNPKK REATIVA SERVISU REDE NASIONAL BA PREVENSAUN KONFLITU

Dili-Diresaun Nasional Prevenaun Konfliktu Komunitariu (DNPKK), ne'ebe maka tutela iha Ministerio do Interior nia okos hamutuk ho nia parseiru no Sociedade Sivil iha Tersa-feira ne'e (24/03/2015), iha salaun enkontru Servisu Migrasaun Vila-Verde, reativa fali Rede Nasional ba Prevenaun Konfliktu (RNPK) hodi defini programa prioridade ne'ebe maka sei hala'o iha tinan ida ne'e nia laran.

Objetivu husi enkontru ne'e, atu reativa fila fali Rede Nasional ba Prevenaun Konfliktu nian, no sei hala'o mos knar hodi suporta Diresaun Nasional ba Prevenaun Konfliktu Komunitaria, atu define padraun ba Politika Prevenaun Konfliktu no Jestaun hodi Prevene konfliktu Komunitaria.

Iha sesaun dahuluk Diretora DNPKK, Sra. Lidia Lopes de Carvalho hatete, "Rede ida ne'e sei kompostu husi Instituisaun Governu no Sociedade Sivil ne'ebé hala'o knar iha area prevenaun konfliktu. Knar sira ne'ebe Rede Nasional Prevenaun Konfliktu (RNPK) atu hala'o mak halibur no fahe informasaun ba parte hotu, hodi hatene no akompaña kona-ba asuntu konfliktu atual no potencia konfliktu ne'ebe bele mosu iha futuru.

Entertantu tuir Diretora NGO BELUN, Sra. Marilia Oliveira da Costa hatete katak, husi parte BELUN nian deteta ona programa prioridade faktual 3, ne'ebe sei lori mai tetu iha ne'e. Hanesan programa primeiru maka peskador husi Atauro nian ne'ebe hetan torturasaun husi nasaun vizinho, segundu maka peskiza ba Aeroporto iha Covalima no ikus liu iha rai ketan Oecusse konaba implementasaun zona especial ne'ebe comunidade balu sei hetan eviksaun (Gusur-Indo). Atividade seluk maka problema joventude, karik atividade ne'e organizasaun barak halo ona, maibe ita mos bele hare no halo espesifik liu tan.

Relasiona ho servisu rede ne'e, iha fatin hanesan Tuir asesor DNPKK Sr. Francisco Cruz Simões Soares, haktuir katak, DNPKK rasik pruntu no iha ona programa prioridade no atividade especial balu ne'ebe atu hala'o, liga ho prevenaun konfliktu nian, maibe programa hirak ne'e sei konsulta ho rede servisu nian, hodi nune'e labele iha dupla atividade. Ha'u hanesan ema Timor oan ida, atu dehan deit katak, atividade ne'e fila fali ba ita nia inisiativa no kreatividade. Importante liu maka ne'e, ema Timor oan tomak persiza atu hatene informasaun konaba prevenaun konfliktu atraves de papel media, hodi nune'e bele apela ba comunidade tomak atu iha konsensia no hatene informasaun konaba prevenaun konfliktu rasik. Ida tan maka ne'e, maioria jersaun foun iha banku eskola, entaun estrategia ita nian maka, ita tenki hala'o edukasaun sivika iha area eskola nian. Tenik asesor ne'e.

Nune'e mos Xefi Departamentu Prevenaun Konflitus Ministeriu Interior nian, Sr. Antonio Viegas, konsidera ho reativa rede nasional ba prevene konfliktu ne'e diak tebes atu bele preve konfliktu iha suku idak-idak liu-liu prevene konfliktu iha comunidade nia let. Tanba ne'e liu husi rede ne'ebe maka estabelese bele servisu hamutuk ho komponenti sira seluk atu prepara planu prioridade hodi prevene konfliktu iha rai laran. Iha parte seluk, reativa Rede ida ne'e mos sei dezenvolve sistema monitorizasaun no evaluasaun bazeia ba indikador sira ne'ebé iha, no mos efetiva liu tan servisu diskusaun entre membru sira. Promove atividade harii kapasidade liu husi formasaun ka seminariu nasional hodi reforsa politika ba prevenaun konfliktu, nune'e bele atinji Paz no Estabilidade iha Timor-Leste. Iku Pires

